


FASNACHTSGESELLSCHAFT



BASEL ALTI GARDE GEGR. 1995

Fasnacht 2001

S'hett sich ebbis zämmebraut

„E Bier mit Dir“- so duet me saage
Leschd der Durschd, git Woolbehaage
Dringgsch ains z'vyyl, bisch nimm elai
Denn hesch e Knibbel in de Bai

Bier isch e wytverbräitets Gseff
Es suffes alli, vom Bietzer bis zem Scheff
Sogar der Adel-wenn au alles bleed gafft
Dringgt dä eedli Gärschdesaft

Die Dytsche suffes wie gschdeert
Will sich das fir d'Schwoobe schynts so gheert
E Waggis schweert uff si Kronenbourg
Gisch em en anders machsch en suur

E dunkel Guinness gits bi de Bryte
Das gäb Luschi und Muet zem Ryte
D'Ami rugge mit Yankee-Fusel dr Lääbere uff d'Pelle
Und kenne nochhäär d' Wahlstimme nimm zelle

Au mir Basler dien druff blange
Uff e keschdlig-kiehli Stange
Bis vor kurzem isch das eso gsi
Denn macht dä Jeker alles hi

Us Wartegg wird Fäldschlessii zämme mit Hürlimaa
S'goot nur um d'Stitz, d'Kultur stoht hindedraa
Der Jeker-Zwärg will nur no uff Immobilie fliege
Verschärbled s'Bier an Carlsbärg duet is so bitriege

Jä gohts denn no isch da Kärli vellig bsoffe
Uns Basler hett's gopfergässe tröffe
Mit Globalisierig het das nyt meh z'due
Sone Saich bringt is us der Rueh

Dä het die ganzi CS scho verdrait
Und speeter bi der MUBA au versait
Was er mit em Bier gmacht het, hämmer gseh
Wohrschnyng het dä Ochs scho zimmlig BSE

Es git vyyl wo saage, das isch doch Wurscht
D'Hauptsach s'isch ebbis geege der Durscht
Seile die doch uff andere Hochzyte danze
Bier isch Bier und git e digge Ranze

D'Barbara Schneider dringgt's ganz verhalte
Es syg schynts guet gege d'Falte
D'Schallere die absäggti Däsche
Nimmts nur bim Drägg-Wesch wäsche

Der HaMaTschu het is ganz scheen gleggt
Und haltet sich wie immer versteggt
Der Schindhelm isch uffs Bier ganz versässe
Bi ne baar Stange sy d'Vergangehait vergässe

Jomene halbe Bächer der -minu lallt
Die Dääne sin mer aifach z'kalt
Es dringges alli - au die wo bledd deen schwätze
Wie die Griene, die Rächte und au die Lätze

Der Jeker duet jetzt kai Verantwortig meh traage
Jetzt hän nur no die Dane s'grossi Saage
Ych wett die hän sogar der Maage
Und wänn das mir is mit ihne vertraage

Bestimmt wann is die bekeehre
Ass mer afeehn Dänisch leehre
Zern bröönen Ren haisst denn der bruuni Mutz
E Stange koschtet fimf Krone und nimm drei Stutz

Anstatt enere Frikadelle herje wie ööd
Bikunnsch e furztrockes Smöörebrööd
Au kasch nimm in e normali Baiz ynegoh
Jetzt gosch ganz dänisch in e Kro

S'Schlossfrailain isch nimmi Trumpf
Us ihre macht me „et Pippi Langstrumpf“
Und s' Fäldschlessii-Brauerwärgg
Wird umfunktioniert zu Fäldbärg

Vyyl het sich zämmebraut in der letschde Zyt
Doch d'Fuscht im Sagg mache nutzt is nvt
D'Zehn zämme bisse das macht Sinn
Sogar wenn si nonig emool zaahlt sin

Ainigkait macht stark hän si uff em Rütli gschwore
Denn isch Hopfe und Malz nonig ganz verlore
So Jeker-Deppe won is nur wänn neppe
Muess me zue Glyche in d'Klabbsmiihli schlebbe

**D Ladäärne sinn vom Mäntig znacht bis am
Mittwoch demorge uff em Minschterplatz**

www.muggedaetscher.ch